

### III DOMENIE DI AVENT

#### Antifone di jentrade Fil 4,4-5

Stait simpri legris tal Signôr.  
Us al torni a dî: stait legris,  
il Signôr al è dongje.

No si dîs Glorie a Diu.

#### Colete

Cjale, Diu, il to popul  
che al spiete cun fede la nativitât dal Signôr  
e fâs che al rivi a celebrâ cuntune contentece dute gnove  
il grant misteri de salvece.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

#### PRIME LETURE Sof 3,14-17

Il Signôr al scriularà di gjonde par te.

Dal libri dal profete Sofonie  
Gjolt, fie di Sion,  
indalegriti, Israel,  
sta contente e gjolt cun dut il cûr,  
fie di Jerusalem:  
il Signôr al à parâts jù i decrets de tô condane  
al à fat lâ il to nemi par un'altre strade.  
Il Signôr, re di Israel, al è framieç di te,  
no sta vê plui pôre di disgraciis.  
In chê di si disarà a Jerusalem:  
«No sta vê pôre, Sion,  
no sta lassâti colâ i braçs!  
Il Signôr, to Diu, al è framieç di te,  
lui al è un vuerîr che al salve.  
Lui al scriularà di gjonde par te,  
ti tornarà a fâ gnove pal so bonvolê,  
al saltarà par te scriulant  
come tai dîs di fieste».  
Peraule di Diu.

#### SALM RESPONSORIÂL Is 12,2-6

R. Aleluia: il Diu de gjonde al ven framieç di nô.

Ve, Diu al è la mê salvece,  
mi fidi e no ài pôre;  
parcè che la mê fuarce e il gno cjant al è il Signôr;  
al è lui la mê salvece. R.

O urissarês aghe cun gjonde  
a lis risultivis de salvece.  
E in chê di o disarês:  
Laudait il Signôr, berlait il so non;  
fasêt cognossi framieç dai popui lis sôs robonis;  
berlait che il so non al è grant cence fin. R.

Cjantait al Signôr parcè che al à fatis robis maraveosis,  
e chest lu sa il mont intîr.  
Scriule e berle di gjonde, int di Sion,  
parcè che al è grant framieç di te  
il Sant di Israel! **R.**

### **SECONDE LETURE Fil 4,4-7**

**Il Signôr al è dongje.**

De letare di san Pauli apuestul ai Filipês

Fradis, stait simpri legris tal Signôr. Us al torni a dî: stait legris. Il vuestri biel trat a àn di cognossilu ducj i oms. Il Signôr al è dongje. No stait a bacilâ par nuie, ma in ogni vuestre consequence palesait a Diu ce che us covente, cu la supliche e cu la preiere di ringraziament. Alore la pâs di Diu, che e va plui in là di ce che la reson e pò pensâ, e veglarà in Crist Jesù sui vuestris cûrs e sui vuestris pinsîrs. Peraule di Diu.

### **CJANT AL VANZELI Is 61,1**

**R. Aleluia, aleluia.**

Il spirt dal Signôr Diu al è parsore di me,  
mi à mandât a puartâur la buine gnove ai puars.

**R. Aleluia.**

### **VANZELI Lc 3,10-18**

**E nô, ce vino di fâ?**

Dal vanzeli seont Luche

In chê volte, la fole e interpelave Zuan disint: «Ce vino di fâ?». Lui ur rispuindeve: «Chel che al à dôs toniis, che int dedi une a di chel che no 'nd à; e chel che al à ce mangjâ, che al fasi compagn». A rivarin ancje un trop di publicans par fâsi batiâ. I domandarin: «Mestri, ce vino di fâ?». Zuan ur rispuindê: «No stait a scuedi nuie di plui di ce che us è stât destinât». Ancje un pôcs di soldâts lu interpelavin: «E nô, ce vino di fâ?». Ur rispuindê: «No stait a fâ i prepotents cun nissun, no stait a denunciâ il fals, contentaitsi de vuestre pae». Intant il popul al jere simpri di plui in spiete e ducj si domandavin tal lôr cûr se Zuan nol fos il Messie. Alore Zuan ur rispuindê: «Jo us batii cu l'aghe, ma al ven un che al è plui fuart di me, che no merti nancje di dispeâi la coree dai siei sandui. Lui us batiarà tal Spirtu Sant e tal fûc. Al à in man une grande pale par separâ il forment de pule; al ingrumarà il forment sul so cjast ma la pule le brusarà cuntun fûc che no si pò distudâlu». Cun chestis e cun altris raccomandazions i predicjave al popul la salvece.

Peraule dal Signôr.

**Si dîs** O crôt.

### **Su lis ufiertis**

Signôr, che ti vegni presentade cence polse  
la ufierte di chest sacrifici,  
par che e colmi il sant misteri che tu âs istituît  
e cu la sô fuarce e operi in nô la tô salvece.  
Par Crist nestri Signôr.

### **Antifone a la comunion cf. Is 35,4**

Disê ai cûrs sconsortâts:  
Coragio! No stait a vê pôre,  
ve, il nestri Diu al ven e nus salvarà.

### **Daspò de comunion**

O implorìn, Signôr, la tô misericordie  
par che chescj jutoris dal cîl nus smondein de tristerie

e nus preparin a lis fiestis che a stan par rivâ.  
Par Crist nestri Signôr.